

2020-21 年度「積金好僱主」嘉許典禮  
暨疫後營商分享會  
2021 年 10 月 5 日

強制性公積金計劃管理局  
主席劉麥嘉軒女士 致辭

羅致光局長、孫玉菡處長、各位僱主、各位嘉賓：

大家好！歡迎大家出席「積金好僱主」嘉許典禮。首先，我好多謝勞工及福利局局長羅致光博士、同埋勞工處處長孫玉菡先生擔任主禮嘉賓，仲有多謝各位支持機構同埋受託人一直以來對呢個計劃嘅支持。當然唔少得多謝我哋嘅主角，即係咁多位「積金好僱主」嘅得主，同埋透過網上直播參與嘅朋友。多謝晒！

積金局希望透過「積金好僱主」嘉許計劃，促進僱主遵守強積金法例，同時鼓勵僱主加強對僱員嘅退休保障。

自從我 3 月中上任積金局主席之後，我見過好多個勞工團體同前線工友，有唔少打工仔都同我講，雖然新冠疫情令經營好困難，但有好多老闆仍然堅持為僱員提供應得嘅福利同退休保障，令佢哋對公司更有歸屬感，工作更賣力。

香港有好多好老闆。雖然疫情為營商帶嚟好多挑戰，但今年「積金好僱主」仍然收到 1,761 個申請，當中有 1,740 位僱主符合評核條件獲得嘉許，兩組數字都創呢個計劃設立 7 年以嚟嘅新高，其中近 300 間公司同埋機構更加係首次參加。各位好老闆喺忙於抗疫嘅同時，仍然無忘記僱員嘅退休保障，實在好值得嘉許。

積金局自 2015 年開始舉辦「積金好僱主」嘉許計劃以嚟，累積近 2,500 位僱主獲頒呢項殊榮，佢哋嚟自各行各業，粗略估計，合共聘用近 25 萬名打工仔。另外，今年有 331 間公司同機構連續 7 年獲嘉許為「積金好僱主」，其中 47 間更同時符合多個評核條件，成為「全能積金好僱主」。係名符其實嘅模範「好老闆」。

強積金制度係 2000 年 12 月引進，我哋依家正邁向第三個十年，我哋需要持續發展，不斷改進，令制度更完善。我擔任積金局主席嘅其中一個「重要任務」，就係確保強積金制度歷來最大規模嘅改革 — 積金易平台項目順利推行。我哋而家正積極構建緊呢個平台，預計最快會嚟出年 2022 年年底起好，然後喺 2023 年開始分批轉移帳戶資料，最快喺 2025 年年初全面運作。當積金易平台全面啟用之後，將會令強積金嘅運作效率同用家體驗煥然一新，為僱員、僱主帶嚟好多實質好處。

積金易平台嘅成功關鍵，在於平台嘅使用率，所以我哋亦會趁呢個平台構建緊嘅時候，全力推動僱主、僱員、業界，同埋積金局加快數碼轉型嘅步伐，提升大家嘅數碼能力。我喺度呼籲各位僱主，盡早使用受託人提供嘅電子工具處理強積金，為日後使用積金易平台做好準備。

疫情雖然為我哋帶嚟好多唔方便，但正所謂「有危就有機」，佢亦同時為一啲行業帶嚟新嘅商機。為咗等各位老闆更加了解疫情帶來嘅機遇，今日我哋請咗幾位嘉賓講者，同我哋分享疫情後嘅經濟環境、營商機遇，同埋人才管理策略，希望大家可以借鏡呢啲經驗，等大家嘅業務可以更上一層樓。

再一次喺度恭喜各位「積金好僱主」，祝大家身體健康、工作愉快、事事順利。多謝！